

Nuugaatsiarmit Illorsuarmiullu qimarnunneqarneranni, inuiaqatigiinniit inissanik taarsiiluni agguaassinermit neqeroorutaasut pillugit apeqquteqaat aallaavigalugu oqallinnissamik siunnersuut

(Inatsisartuni ilaasortaq, Karl-Kristian Kruse, Siumut)

Saqqummiussinermit akissuteqaat

(Ineqarnermut Attaveqaqatigiinnermullu Naalakkersuisoq)

Naalakkersuisut sinnerlugit Inatsisartuni ilaasortaq Karl-Kristian Kruse, Siumut, Nuugaatsiarmit Illorsuarmiullu qimarnunneqarneranni, inuiaqatigiinniit inissianik taarsiilluni agguaassinerit neqeroorutaasut pillugit apeqquteqaat aallaavigalugu oqallinnissamik siunnersuuteqarneranut qutsavigaara.

Siullermik erseqqissaatigissavara, Nuugaatsiamiit Illorsuarniillu qimarnussanut suliniuteqarnermut atatillugu matumani sillimmasiisarnermi tunngavissat naapertorlugit taarsiissuteqartoqannginnissaa Naalakkersuisut aallaavigisimammassuk aammalu tamanna suli aallaavigimmassuk. Akerlianik innuttaasut eqqugaasut inuunerminnik ingerlatitseqqinnissaat siunertaralugu inunnik ikiuniarnertut ittumik suliniuteqartoqarpoq.

Taamatut aallaaveqarnissaq tunngavigalugu innuttaasunut Nuugaatsiameersunut Illorsuarneersunullu inissianik taartissanik agguaassinissamut tunngavissanik Naalakkersuisut aalajangiipput.

Innuttaasut tamarmik assigiimmik pinninnissamut tunngavissat malillugit pineqarnissaat qulakkeerniarlugu, Naalakkersuisut inissianik taartissanik agguaassinissamut tunngavissanik ersarissunik aalajangersaapput.

Tassalu Naalakkersuisut juunip arfineq aappaani 2018-imi aalajangiipput, Nuugaatsiami Illorsuarnilu innuttaasunut inissianik taartissanik agguaanermi tunngavissat matuma kinguliani aalajangersarneqartut malinneqassasut:

- Innuttaasut tassaarsuaqarnerata nalaani Nuugaatsiami Illorsuarnilu najugaqartutut inuit nalunaarsorsimaffianni nalunaarsorsimasut kisimik inissianik taartissanik agguarneqassapput.
- Innuttaasut inissiamik pioreersumik, Nuugaatsiap Illorsuillu avataanniittumik namminneerlutik pigisaqarnikkut imminnut pilersorsinnaangitsut kisimik inissianik taartissanik tunineqassapput.
- Inoqutigiit ataasiakkaat inissiamik pioreersumik, Nuugaatsiap Illorsuillu avataanniittumik namminneerlutik pigisaqarnikkut imminnut pilersorsinnaasut taarsiissutissanik 50.000 korusuninik tunineqassapput.
- Tassaarsuaqarnerata nalaani inoqutigiit ataasiakkaat inissiamik taartissamik ataatsimik tunineqassapput.
- Inoqutigiinni inuit amerlassusaat inissiap taartissap tunniunneqartup annertussusissaanut aalajangiisuussapput.

- Tassaarsuaqarnerata nalaani inoqutigiinnut B-normunik piginnittunut inissianik nammineerluni pigisassanik agguaasoqassaaq.
- Attartortut tunngaviusumik inissiamut attartortittakkamut innersuunneqartassapput.
- Inoqutigiit Upernavimmit Uummannamillu taakkulu eqqaanniittunit allaanerusumut nuunnissartik kissaatigippassuk, illoqarfinni annerusuni inissianut attartortittakkanut innersuussinikkut inissianik taartissanik agguaassisoqarsinnaavoq. Attartortoq nammineerluni maleruagassat atuuttut naapertorlugit ineqarnermut akiliuteqartassaaq.

Tunngavissat juunip 15-ani 2018-imi Inatsisartut Aningaasaqarnermut Akileraartarnermullu Ataatsimiititaliaannit akuerineqarput, aalajangiinerlu Inatsisartut nittartagaanni nassaarineqarsinnaavoq, Aningaasaqarnermut Ataatsimiititaliamit aalajangiinerit ataanni.

Aamma tunngavissat Naalakkersuisut nittartagaat aqcutigalugu tamanut ammasumik saqqummiunneqarput. Inissianik taartissanik agguaassineq tunngavissat taakkua malillugit aammalu Kalaallit Nunaanni Eqqartuussiveqarfiup nalunaarsuiffiini illunik piginnittut nalunaarsorsimasut aallaavigalugit ingerlanneqarput.

Suliniutit annertoorsuit, soorlu isertitatigut tunngavissanik pilersitseqqinnissamik, pequtinik, atisanik angerlarsimaffinnilu atortussanik pissarseqqinnissamik siunnerfeqartut matumani pineqarput. Tamatumunnga atatillugu innuttaasut eqqugaasut inissinneqarnissaat suliniutini qitiusimavoq – aallaqqaammut utaqqiisaagallartumik inissiisoqarluni – tamatumalu kingorna najugarilivitassanut inisseeqqittoqarluni.

Naggasiutigalugu erseqqissaatigineqassaaq, juunip 17-ani 2017-imi ajunaarnersuaqarmat Naalakkersuisut ajunaarnersuaq pillugu saaffiginnissuterpasuumut akissuteqartarsimammata. Innuttaasut sapinngisamik namminneerlutik kissaataat malillugu najugaqarfigigallagassaannik neqeroorfigineqartarsimapput. Innuttaasut qimarnunneqarnerinut atatillugu innuttaasut najugaqarfissamut nutaamut kissaataannik apersorneqarput, tassanilu innuttaasut tupaqqanerminnik qaangeereernerminni kissaatiminnik nalileeqqinnissamut periarfissinneqarput.

Innuttaasut tamarmik tunngavissat matuma siuliani taaneqartut malillugit assigiimmik pineqarput. Namminersorlutik Oqartussat, kommuni innuttaasullu ataatsimut innuttaasunut eqqugaasunut ikiuiniarnermi nammaqatigiillutik suliniuteqarsimanerat Naalakkersuisuniit tulluusimaarutigaarput. Soorunami misigisaq najugaqartunut eqquinerluttoq, annertuumik ikiuiniartoqaraluartoq innuttaasunut sunniisimasoq matumani pineqarmat Naalakkersuisut ilisimavaat.

Naalakkersuisut sinnerlugit oqallilluarnissassinnik kissaappassi aammalu partiit isummersuutaasa tusarnissaannut qilanaarpunga.